

## Нафл рўзани биродари учун очиб юбориш ЖОИЗ



14:25 / 10.06.2017 9570

Нафл рўза тутиб олган кишининг биродари уни пешиндан олдин таомга таклиф қилса, биродари ўша таомни у билан бирга ейишдан хурсанд бўлса, рўзадор одам биродари учун оғзини очиб юбориши мумкин. Шунингдек, нафл рўза тутган одамнинг ота-онасини ёки улардан бирини хурсанд қилиш учун пешиндан кейин бўлса ҳам оғзини очиб, улар билан бирга таомланиши мумкин. Аммо кун охирига қолган бўлса, рўзасини охирига етказгани афзалдир.

*Имом Бухорий Абу Жуҳайфадан ривоят қилади:*

«Набий соллаллоҳу алайҳи васаллам Салмон билан Абу Дардони биродар тутинтириб қўйдилар. Бир куни Салмон Абу Дардоникига келди. Умму

Дардонинг жулдур кийим кийиб юрганини кўриб, «Сенга нима бўлди?» деди. У: «Биродаринг Абу Дардонинг дунё билан сира иши йўқ», деди. Абу Дардо келиб, унга таом тайёрлади-да, «Сен еявер, мен рўзадорман», деди. Аммо у: «Сен емагунингча мен ҳам емайман», деди. Шунда у ҳам бирга еди. Кеч киргач, Абу Дардо (тахажжудга) турмоқчи бўлган эди, (Салмон) «Ухла!» деди. У бироз ухлади. Сўнг яна турмоқчи бўлган эди, у яна «Ухла!» деди. У яна бироз ухлади. Тун охирлаганда Салмон: «Энди тур», деди. Икковлари намоз ўқишди. Шунда Салмон унга: «Сенинг зиммангда Роббингнинг ҳам ҳаққи бор, нафсингнинг ҳам ҳаққи бор, аҳлингнинг ҳам ҳаққи бор. Ҳар бир ҳақ эгасига ҳаққини бергин», деди. Кейин (Абу Дардо) Набий соллаллоҳу алайҳи васалламнинг ҳузурларига келиб, у зотга буни сўзлаб берган эди, Набий соллаллоҳу алайҳи васаллам: **«Салмон тўғри айтибди»**, дедилар».

Бир киши рўзадор бўлса-ю, бир қавмникига меҳмонга борса ҳам, у ерда оғзини очмаслиги, рўзасини тугал қилиши жоиз.

*Имом Бухорий Анас розияллоҳу анҳудан ривоят қилади:*

«Набий соллаллоҳу алайҳи васаллам Умму Сулаймнинг ҳузурига кирдилар. Умму Сулайм у зотга хурмо билан ёғ келтирди. У зот: **«Ёғни мешкобига, хурмони идишига қайтаринглар, мен рўзадорман»**, дедилар. Сўнгра унинг бир четига ўтиб, фарздан бошқа намоз ўқидилар ҳамда Умму Сулайм ва унинг оила аъзолари ҳаққига дуо қилдилар. Шунда Умму Сулайм: «Эй Аллоҳнинг Расули, менинг кичик бир хос ҳожатим бор», деди. У зот: «Нима у?» дедилар. У: «Ходимингиз Анас...» деди. Шунда у зот дунёю охиратнинг бирор яхшилигини қўймай, **«Аллоҳим! Унинг молу давлатига, авлоду зурриётига барака бергин»** деб ҳаққимга дуо қилдилар.

Мана, ҳозир мен ансорларнинг энг бадавлатлариданман. Қизим Умайна нинг айтишича, Ҳажжож Басрага келганда менинг пушти камаримдан бир юз йигирма нечаси дафн қилинган экан».

### **Жума кунининг ўзидагина рўза тутишнинг ҳукми**

Жума кунининг ўзида рўза тутиш макруҳдир. Фақат ундан олдин ёки ундан кейин бир кунни қўшиб тутиш мумкин.

*Имом Бухорий Абу Ҳурайра розияллоҳу анҳудан ривоят қилади:*

«Набий соллаллоҳу алайҳи васалламнинг **«Бирортангиз жума куни рўза тутмасин, фақат ундан олдинги ёки кейинги кун**(ни қўшиб тутса майли)», деганларини эшитганман».

*Имом Бухорий Жувайрия бинт Ҳорис розияллоҳу анҳодан ривоят қилади:*

«Набий соллаллоҳу алайҳи васаллам жума куни бизникига кирдилар. Мен рўзадор эдим. У зот: **«Кеча рўза тутганмидинг?»** дедилар. «Йўқ», дедим. **«Эртага тутмоқчимисан?»** дедилар. «Йўқ», дедим. **«Унда оғзингни очиб юбор»**, дедилар».

### **Арафа ҳамда Ашуро куни рўзасининг ҳукми**

*Имом Муслим Абу Қатода розияллоҳу анҳудан ривоят қилади:*

«Бир киши Набий соллаллоҳу алайҳи васалламнинг ҳузурларига келиб, Арафа кунининг рўзаси ҳақида сўради. У зот: **«Умид қиламанки, Арафа кунининг рўзаси ўзидан олдинги ва кейинги йил учун каффорат бўлади. Умид қиламанки, Ашуро кунининг рўзаси ўзидан олдинги йилнинг гуноҳларига каффорат бўлади»**, дедилар».

### **Ашуро тўққизинчи кун экани ҳақидаги ривоятлар**

Илм аҳли Ашуро куни ҳақида ихтилоф қилишган. Баъзилари уни муҳаррам ойининг тўққизинчи куни, баъзилари эса ўнинчи куни дейишган. Шунингдек, тўққизинчи ва ўнинчи кунлари деганлар ҳам бор.

*Абу Довуд Ибн Аббос розияллоҳу анҳумодан ривоят қилади:*

«Набий соллаллоҳу алайҳи васаллам Ашуро куни ўзлари ҳам рўза тутиб, бошқаларни ҳам бу куннинг рўзасини тутишга амр қилганларида одамлар: «Эй Аллоҳнинг Расули, бу кун яҳудий ва насоролар улуғлайдиган кун эди», дейишди. Шунда Расулуллоҳ соллаллоҳу алайҳи васаллам: **«Келаси йил, иншааллоҳ, (ўнинчи кун билан бирга) тўққизинчи куннинг рўзасини (ҳам) тутамиз»**, дедилар».

Ҳожилар заифлашиб, дуо ва зикрдан қолиб кетмаслиги учун Арафа куни рўза тутмасилик мустаҳаб саналади. У зот соллаллоҳу алайҳи васалламнинг қилган ишлари буни очиқлаб беради:

*Имом Бухорий Умму Фазл бинт Ҳорис розияллоҳу анҳодан ривоят қилади:*

«Бир гуруҳ одамлар Арафа куни менинг олдимда Набий соллаллоҳу алайҳи васалламнинг рўзалари ҳақида тортишиб қолишди. Баъзилари «У зот рўзалар», деди, баъзилари «Рўза эмаслар», деди. Шунда мен у зотга бир қадаҳ сут юбордим. У зот туяда турган жойларида уни ичдилар».

*Таржимон **Муҳаммад Али Муҳаммад Юсуф***